



## Olimpiades de fisica e matematica 2017/18

Ti trei licees de Fascia l'é vegnù fora i resultat de la proes per i miors studenc de matematica e fisica de la Scola Ladina de Fascia

**Matematica e fisica** - Ence per l'an scolastich 2017/18, desche i etres egn, i professores de la Scola Ladina de Fascia, più avisa i professores Bergamo e Zulian, i à metù a jir la olimpiades de matematica e fisica.

La proes de matematica les é states spartides anter prumes doi egn e ùltime tre egn de scola auta. Enveze per la fisica l'é stat fat fèr la proes demò ti ùltime tre egn.

Per duta la doi materias scientifiches, l'é stat tout ite duc i licees de Fascia: scientifich, linguistich e artistich.

Chest an anter i miors l'é stat ence n muie de eles, bel!

### I più forc de matematica

Al 1° post de la olimpiades de matematica al bienie l'é stat Michelle Chiocchetti de la seconda scientifich, al 2° post l'compagn de clasc Rocco Croce, al 3° Irene Tabanelli de la


prima artistich e al 4° post ensema l'é Lorenza Cloch de la prima artistich e Mara Pellegrin de la seconda scientifich.

Del trienie de matematica al 1° post l'é Lorenzo Riz de la terza scientifich, al 2° post Fabio Bernard, al 3° Sofia Lastei e al 4° Alessia Cemin, duc trei de la quinta scientifich e al 5° post l'é Sebastiano Rasom de la terza scientifich.

### I più forc de fisica

Per la fisica i miors cinch i é duc del liceo scientifich. Al 1° post l'é Alfredo Carbonara e al 2° Edoardo Mich de quarta; al 3° Lorenzo Riz e al 4° Vincent Stambé de terza e al 5° Christian Soraruf de quinta.

I miors cinch de fisica i jirà a Trent ai 20 de firé a raprejentèr la Scola Ladina a la selezion del Trentin



**Alfredo Carbonara da Juan, l mior student de fisica de la Scola de Fascia.**



**Lorenzo Riz da Ciampedel mior del trienie de matematica e anter i miors de fisica.**

e demò i miors doi de matematica (Lorenzo Riz e Michelle Chiocchetti) i jirà a Trent ai 22 de firé per raprejentèr la Scola.

### L meis de jené rich de attività per la Scola de Fascia

Apede a la Olimpiades de matematica e de fisica te Scola ladina de Fascia via per chest meis de jené taca endò l cors droni per i studenc; va inant l cors de Stampante 3D che l'é tacà via de dezember e i studenc del grop de robotica jirà a Reggio Emilia e a Pamplona.

Duc de bie projec scientifics, ensema ence a chel de la torbiera de Roncon, che vegnarà prejentà dessema a la picola publicazion che à enjgnà l grop de lurier, e ben segur a la prejentazion de la seconda edizion del sfoi de la scola Filoreflex!

## Emparèr travers l jech e l divertiment

Te la populèra de Vich l'é stat metù a jir n projet de educazion motoria veicolara rencurà dal joen espert Roberto Pasero, che l ne reiona ence de etres projec porté inant te Fascia

**Scola e sport** - Duc sà che l jech e l moviment fèsc pèrt de la natura di bec. Tant i insegnanc che i pedagogisc é a una sul fat che l'educazion motoria, ben segur sot forma de jech, pel didèr dassen n muie te la crescimonia di picoi e la pel doventèr n meso prezios per passèr conzec ence de altra disciplines.

Te la pruma populèra de la scola de Vich de november l'é pontà via n projet sperimentèl rencurà da l'espert Roberto Pasero, n joen da Moena laureà a la facultà de Scienze Motorie de Verona, che l ne à contà mingol

de che che se trata.

### Educazion motoria veicolara

L projet l'ha inom educazion motoria veicolara e l se ouc ai bec de le scole popolare. Dal Coni l'é stat domanà de proponer chest projet, che da n par de egn l'é stat envià via a Trent e ti raions dintorn, ence te Fascia - l'ha deschiari Pasero - olache no l'era amò stat l met percheche no l'era nesciun espert enteressà.

Per endana l'é stat demò na clas te

duta Fascia che à dat sia adejion, la pruma populara de Vich, con la maestra Dolores Della Putta.

L projet, che l'é spartit te 8 moduli de 4 ore ogneun (ogne modul l'é fat de 3 ore de projet e l de programazion), l perveit na interazion stenta anter na insegnanta e n espert laureà te Scienze Motorie daite de la clas endana le ore de lezion. L'é sperimental, desvalif dai autres percheche n muie spezifich e articolà. L'é pervedù 32 ore e estra che chele te palestra, che te chest cajo le é 24, l'é in più 8 ore de programazion demò con la maestra, da svilupar aldò de la resposta de la clas. La particolarità de chest projet l'é che l'educazion motoria veicola apontin le altre materie.

A Vich la maestra che se cruzia de motoria fasc ence talian e geografia, l'obietif del projet donca l'é chel de entener se l'educazion motoria deida l'aprendiment ence de altre materie. Per endana l'é stat fat l prim modul de cognoscenza de la clas e proponet jehges multidisciplinaries te palestra, dapodò se é jic inant col secondo modul, luran sul talian, aldò de l'argoment tratà te clas. A una con la maestra l'é stat creà attività per l svilupar, ben segur sot forma de jech.

L'ora perveit semper n moment al scomenz per sciudar i muscoi, dapodò l'é la part centrala olache se porta inant chel che l'é stat programà, semper desche jech, per dò serar sù col jech final.

"Me prem sotlinear - enjonta

Pasero - che i bec touc ite te chest projet no i fasc "lezion" ence endana le ore de motoria, ma i à semper l met de se sfogar e de se divertir, desche l'é giust che sie, percheche le attività vegn proponete a na vida che i picoi no i entiva che se trata de n lurier con finalitè cognitive. L'é chiar che l'é fundamental che l'espert sie bon de mantegnir chest nivel da calità, olache se jia e se empara travers l moviment."

Per endana l'é amò massa prest per poder dar na valutazion ogativa, ma la maestra à palesà sodesfazion, ence dò pece lezion, uzan fora che i bec i tol part bolintiera a cheste attività e i ge tegn a le far, se didan un co l'auto, tel cader de na bela interazion ence anter de ic. L'é da dir ence che i scouta e i obedesc zenza nesciuna fadia e se laora dalbon delvers. Chest l'é dalbon n bel resultat, che dasc sodesfazion.

### Etres projec del Coni

N autoer projet del Coni l'é l'alfabetisazion motoria che te Fascia te chest an de scola l'é pontà via te la prumes e la secondes populères de Moena, Poza e Cianacei. Ence chiò l'é pervedù che l'espert ge stae apede a la insegnanta che se cruzia de educazion motoria, ma te chest cajo l'é demò 18 ores da fèr te palestra da november fin a la fin de l'an de scola. "Gio son a Moena - disc amò Pasero - olache me cruzie de la doi prumes e de la seconda e alò rejone per ladin. A Poza e Cianacei l'é Mauro Dorigatti. É dezidù de lurar sui schemes motories



**N bel retrat de Roberto Pasero.**

de basa donca vae a svilupar n schem motorie ogne doi lezion. Dò le prume doi lezion de cognoscenza, é fat doi lezion de jir a pe, doi de corer, doi de sutar dapodò jiré inant con strisciar, sluziar e c.i.

Te le terze e le quarte l'é enveze l projet scola sport: ogne meis a tacar da jené rua n espert che propon n sport desvalif. Per ejempie a Moena fae presciistica, de firé la fajaré a Poza, de marz saré endò a Moena per l basket e via via cosci."

L joen espert se disc content de aer l'opportunità de portèr inant chest projec dal moment che l'é apontin per chest che l'ha studià. Ge fazon de bie compliment e ge auguron de cher n davegnir lumenous. (cri.m)



**N moment de l'attività motoria con l'espert te la pruma clas de Vich.**

## N "Babbo Natale" de neif a Poza

I studenc del liceo artistich de Fascia vidé da la prof.a Desilvestro i à realisà la statua de neif te Piazza de Comun a Poza

**Statues de neif** - Va inant la colaborazion anter la Scola Ladina de Fascia e i desvalives enc sul teritorie. Da lunesc ai 18 a vender ai 22 de dezember, per nef ores al di, i studenc e i professores del liceo artistich i à lurà te Piazza de Comun a Poza per la realizazion de na gran statua de neif: n "Babbo Natale" con n gran sach de dons su la schena e sui schi da telemark.

L lurier l'é stat portà a termin en vender 22 da les 7 da sera con l'aproazion e la sodesfazion de duc chi che ge à lurà dò, ma ence de la sorastanta de la Scola de Fascia Mirella Florian e de l'aministrazion de Comun de Poza, che l'aea domanà a la Scola la colaborazion per la

realizazion de na statua per fèr più bel l paisc endàna la festes da Nadèl e valorisèr la tradizion fascèna de la statues de neif portèda inant te val de gra ai professores e ai studenc de la Scola de Fascia che se troa sul tegnir del Comun.

La Sorastanta, n'outa ciapà la domana del Comun de Poza, la ge à dat sù l'encèria a la professoressa Maria Pia Desilvestro, che l'ha sobito metù ensema la squadra de studenc: Martina Parrini e Jasmine Calzoni de la quarta èrts figuratives e Nicholas Marchetti e Stefano De Pinto de la terza èrts figuratives.

La prof.a Desilvestro l'ha contà che i studenc i à lurà dantfora te clasc

fajan n sbos de plastilina en scèla e dapò a l'averta sul blocch de neif schicèda sun chel che l'é stat durà l scorzarel a man e etres èrc per fèr l lurier più fin. L'era per ejempie gregn scherpie, sgolbies e ence na sort de gran gratadoa per slizier.

Per i studenc soraldut l'é stat na esperienza positiva che ge à servi a meter en pratèga i insegnaments fac te clasc, ma ence per etres aspec, desche l lurèr sot i etres e ensema ai etres te na squadra. (vr)

**Studenc e professores de la Scola de Fascia al lurier su la statua de neif te Piazza de Comun a Poza.**

